

欽
定
全
唐
文

欽定全唐文卷二十四目錄

元宗 五

迎春東郊制

贈武惠妃貞順皇后制

封臨晉公主制

贈同安郡王珣太子少保制

春郊禮成推恩制

封蒙歸義雲南王制

貶蕭嵩青州刺史制

貶張守珪括州刺史制

答李林甫賀收安戎城手制

授吐火仙可汗等官爵制

封皇孫倣等爲郡王制

贈鄔元崇棣州刺史制

委刺史縣令勸課制

封高陽公主制

定大唐樂制

追謚寧王憲爲讓皇帝制

天寶改元制

令道教及天地乾坤字須半闕制

追尊元元皇帝父母并加謚遠祖制

命金憲英襲封新羅王制

九月薦衣陵寢制

命孔璣之襲封文宣公制

改年爲載推恩制

赦免囚徒制

令詳定九宮壇儀注制

封和義公主出降寧遠國王制

封太華公主制

封壽光公主樂成公主制

欽定全唐文卷二十四

元宗 五

迎春東郊制

自今已後每年立春之日朕當帥公卿親迎春於東郊其
後夏及秋常以孟月朔於正殿讀時令禮官即修撰儀注
既爲常式乃是常禮務從省便無使勞煩也

贈武惠妃貞順皇后制

存有懿範沒有寵章豈獨被於朝班故乃亞於施政可以
垂裕斯爲通典故惠妃武氏少而婉順長而賢明行合禮

經言應圖史承威里之華胄昇後庭之峻秩貴而不恃謙而益光以道飭躬以和逮下四德粲其兼備六宮咨而是則法度在己靡資珩珮躬儉化人率先締綌夙有奇表將加正位前後固讓辭而不受奄至淪歿載深感悼遂使玉衣之慶不及於生前象服之榮徒增於身後可贈貞順皇后宜令所司擇日冊命

封臨晉公主制

湯沐建封古今通典豈獨貴於寵數亦兼崇於美名第二女性與柔和生知法度率以師氏之訓成其天然之質有

行之禮將及於筭年備物之恩俾開於井賦可封臨晉公
主食實封一千戶

贈同安郡王珣太子少保制

猶子之恩特深於情禮睦親之義必備於哀榮同安郡王
珣稟氣淳和執心忠順邦國垣翰宗枝羽儀磐石䟽封將
期永固逝川不捨俄歎促齡悼往之懷因心所切宜增寵
命用飾幽泉可贈太子少保葬事官給陪葬橋陵

春郊禮成推恩制

皇王之化載籍所陳將奉天而育物必順時而行政雖禮

文則著而親祠蓋闕朕自膺寶歷且踰二紀承宗社之降祉賴公卿之叶心萬物阜成庶務簡易思以黎獻臻夫仁壽是用敦本復古將必稽於月令謀始作則先有事於春郊宜因展禮之辰式布惟新之澤其天下見禁囚應犯死罪者特宜免死配流嶺南已下罪並放免朕每念黎甿弊於征戍親戚多別離之怨關山有往復之勤何嘗不惻隱於懷寤寐增嘆所以別遣召募以實邊軍錫其厚賞便令常住今諸軍所召人數向足在於中夏自可罷兵旣無金革之事足保農桑之業自今已後諸軍兵健並宜停遣其

見鎮兵並一切放還京畿之內雜役殷繁言念勛勞豈忘
優恤頃以櫟陽等縣地多鹹鹵人力不及便至荒廢近者
開浹皆生稻苗亦旣成功豈專其利京兆府界內應雜開
稻田并宜散給貧丁及逃還百姓以爲永業書不云乎不
作無益害有益語不云乎奢則不遜儉則固緬懷前古嘗
折在心將斲雕以爲樸期上行而下效自今已後王公不
得以珍物進獻所司應緣宮室修造務從節儉但蔽風雨
勿爲華飾至於金玉器物諸色雕鏤朕緣蕃客所要將充
宴賞今流俗之間遞相倣效旣損財於無用仍作巧以相

矜敗俗傷農莫斯爲甚并一切禁斷以絕浮華古者鄉有序黨有塾將以宏長儒教誘進學徒化人成俗率繇於是斯道久廢朕用憫焉宜令天下州縣每一鄉之內別各置學仍擇師資令其教授其諸州鄉貢明經進士每年引見訖并令就國子監謁見先師所司設食學官等爲之開講質問疑義且公侯之裔皆稟義方學禮聞詩不應失墜容其僥倖是瀆化源其於貴胄子孫如聞近來宏文館學士多有不專經業便與及第深謂不然自今已後宜一依令式考試朕之爵位惟待賢能雖選士命官則有常調而安

卑遁跡尚慮遺才其內外八品以下官及草澤間有學業
精博蔚爲儒首文詞雅麗通於政術爲衆所推者各委本
州本司長官精加搜擇具以聞薦發生之月實在於行仁
利物之心莫先於作善先斷捕獵令式有文所繇州縣宜
嚴加禁止其每年千秋節日仍不得輒有屠宰道釋二門
皆爲聖教義歸宏濟理在尊崇其天下觀寺有絕無道士
女冠僧尼者宜量觀寺大小度六七十人簡擇灼然有經業
戒行爲鄉閭所推仍先取年高者凡百卿士朕之同德宜
勉所職以合時令禮有時施惠義兼行賞實爲其時固不

可缺亞獻忠王璵宜賜物一千匹終獻潁王璠賜物五百匹邠王守禮寧王憲各五百匹慶王琮已下及長公主郡縣主二王後京文武官賜帛各有差天下諸州侍老宜令所繇長官量賜酒肉務在優養今朝廷無事天下和平美景良辰百官等任追勝爲樂宜即布告中外咸使聞知

封蒙歸義雲南王制

古之封建誓以山河義在疇庸故無虛授西南蠻都大酋帥特進越國公賜紫袍金鈿帶七事歸義挺秀西南是稱酋傑仁而有勇孝乃兼忠懷馭衆之長材秉事君之勁節

瞻言諸部或有姦人潛通犬戎敢肆蜂蠆遂能躬擐甲冑
總率驍雄深入長驅左縈右拂凡厥醜類應時誅翦戎功
若此朝寵宜加俾膺胙土之榮以勵捍城之士復遣中使
李思敬齎冊書往冊焉

貶蕭嵩青州刺史制

王者立法所貴無私有過必懲古之令典太子太師蕭嵩
累踐清資嘗居重任身寵茅土家榮姻戚人臣之貴莫二
止足之分當知曾不是思乃行非道城南別業地即膏腴
畝直千金蓋謂於此遂將數頃輒遺仙童名位若斯恩遇

亦甚昵於庸豎更欲何求靜言其情深所未諭但久經任
使措在朝廷自不飾觀良用驚聽豈可輔導太子頡頏正
人宜從貶出以肅紀綱可青州刺史

貶張守珪括州刺史制

張守珪本自戎行夙承任遇去歲軍務失實乃命謁者監
牛仙童宣諭朕意輒便結託凡細令其詭詞賂以百金兼
之數口恐懼邊塞或容苟求遣謁軒墀何不早自披露用
茲奉國曷以爲顏猶念舊勲俾從寬典可括州刺史

答李林甫賀收安戎城手制

此城儀鳳年中羌引吐蕃遂被固守歲月既久攻伐亦多其城巖險非力所制朝廷羣議不令取之朕以小蕃無知事須處置授以奇計所以行之獲彼戎心歸我城守有足爲慰也

授吐火仙可汗等官爵制

德以柔遠兵以威敵服而捨之古之制也突騎施吐火仙可汗骨啜弟葉護頡阿波等背化乘邊阻兵恃衆雖蟻聚爲梗或擾疆場而王師所向盡擣巢穴憫其束身就戮歸命而朝宜加宥過之典載洽覃恩之命俾厥弟兄並膺光

寵或分茅土復列鉤陳骨啜可左金吾衛員外大將軍仍封爲循義王頡阿波可右武衛員外大將軍

封皇孫倣等爲郡王制

分命本枝列於庶位博考方冊斯爲大猷皇太子之子倣等觀其器識日以通敏仁和之性自然忠孝之誠克備率由禮度能稟義方學旣著於崇儒材可使於從政爰茲拜職宜從紫綬之榮勉爾修身式副綠車之寵可封倣爲廣平郡王儋爲南陽郡王倓爲建寧郡王倔爲西平郡王僅爲新城郡王儼爲潁川郡王又封慶王之子儼爲新平郡

王仲爲平原郡王棣王之子僕爲汝南郡王僑爲宜都郡

王榮王之子備

新唐書表作備傳作俯舊唐書傳則又作佩

爲濟陰郡王偕爲

北平郡王儀王之子侁爲豫章郡王

按新書傳作鍾陵郡王世系表作臨川郡

王舊書傳作供鍾陵郡王並其名亦復互異矣

健新書傳表俱作健舊書傳作健

爲廣陵郡王頴

王之子仲

與慶王之子同名新舊書皆同

爲滎陽郡王永王之子傷

新書傳表

俱作傷舊書傳作瑒

爲襄城郡王壽王之子伾

新書表傳俱作伾舊書傳則作徑

爲

濟陽郡王延王之子倬爲彭城郡王濟王之子僚爲永嘉

郡王

贈鄔元崇棣州刺史制

故洪州人鄔元崇往者來應嘉詔次於號略忽睹元元皇帝俾之昇雲空中與言使戒天后表國祚中興之運示寶厯無疆之期遂能不顧其身來傳此旨竟遭幽繫諒可傷嗟自非竭節本朝孰克犯顏茲日宜加追贈用慰幽魂可贈棣州刺史

委刺史縣令勸課制

古之爲理必順時行令獻歲發春仁氣育物直叶陽和之德以勤播種之務天下諸州委刺史縣令加意勸課仍令採訪使勾當非灼然要切事不得妄有追擾其今月諸色

當番人有單貧老弱者所司即揀擇量放營農至春末已來並宜準此

封高陽公主制

用嘉成德將及推恩䟽封錫號禮典攸在第二十女資身淑慎稟訓柔明克備肅雍之儀允彰圖史之德而方營魯館宜啟沁園俾承寵於中闈復增榮於列賦仍食實封一千戶

定大唐樂制

王者作樂古之大猷蓋以殷薦上帝嚴配祖考況順天地

之理開山川之風發揮雅音導達和氣揖讓而理不其盛歟自戰國以來此道隳壞但紀鏗鏘之節寧採述作之深厯代因循莫之改革朕嘗以聽政之暇緬尋前典雖舊制之空存而正聲之多缺將何以列彼祠祀感於靈明斯事體大諒資合度是用躬親有以裁校定六律而爲本避五行之相尅哀慢淫過去其弊也清濁剛柔適其中也亦旣協應頗爲成文或得之於自然乃不知其本故豈上元幽贊俾正缺遺者哉方於六代之作亦各一時之義也乃命奉常陳於祀事用昭誠敬且敦風俗而王公卿士爰及有

司頻詣闕上言請以唐樂名斯至公事朕安得而辭焉然則大咸大韶大頀大夏皆以大字表其樂章今之所謂宜曰大唐樂

追謚寧王憲爲讓皇帝制

能以位讓爲吳泰伯存則用成其節歿則當表其名非常之稱旌德斯在故太尉寧王憲誕含粹靈允膺大雅孝悌之至本乎中誠仁和之深非因外獎率由禮度雅尚文儒謙以自牧樂於爲善比兩獻而有光與二南而合德自出臨方鎮入配台階逾勵忠勤益聞周慎實謂永爲藩屏以

輔邦家曾不憊遺奄焉殂沒友于之痛震慟良深惟王朕
之元昆合昇上嗣以朕奉先朝之睿略定宗社之阡危推
而不居請予主鬯又承慈旨焉敢固違不然者則宸極之
尊豈歸於薄德茂行若此易名是憑自非大號孰副休烈
按謚法推功尚善曰讓德性寬柔曰讓敬追謚曰讓皇帝
宜令所司擇日備禮冊命

天寶改元制

神之降休禮無不答永言禋祀必在躬親朕粵自君臨載
宏道教崇清淨之化暢元元之風庶乎澤及蒼生時臻壽

域積以歲月未嘗懈怠豈謂微誠感通烈祖降見乃昭靈
命是錫寶符因而求之應言而獲亦既至止果表殊徵諒
惟祕詞不可詳說然邦家大慶何以過焉是知神仙所緘
造化同固爰初有待經韞匱而多時潛應改元若符契之
相合景福攸介祇畏良深而羣官宗室抗䟽於外元良諸
子屢請於中逮夫緇黃兼彼耆老以至懇誠不已前後相
仍願加天寶之名用易開元之號顧惟菲薄曷以當之然
則元訓在乎欽承人心難以推拒順天從衆義協至公敬
依所請實用多愧斯蓋上元厚載爰及百神孚佑効靈協

金史卷之二十一
於睿祖幽贊惟新之歷克彰永代之祥宜遵祀典式陳昭
報可以來月十五日祔元元皇帝廟十八日享太廟二十
日有事於南郊宜令中書門下與禮官等即詳定禮儀具
錄聞奏應緣行事及簡較官等各委有司不須別差人執
當其北郊宜差公卿擇日祭五嶽四瀆及名山大川各令
所在長官備禮陳祭務申誠敬副朕意焉

令道教及天地乾坤字須半闕制

大道先於兩儀天地生於萬物是以聖哲之後咸竭其誠
今後應緣國家致命表疏簿書及所試制策文章一事已

上語指道教之詞及天地乾坤之字者並一切半闕宜宣示中外

追尊元元皇帝父母并加謚遠祖制

庇生人者必崇於大道受成命者實賴於前烈恭惟大聖祖元元皇帝道光太極首出混元宏敷妙門廣運真化雖乘時御氣旣超昇於上清而儲祉發祥每孚祐於來裔祚我寶運格於皇天爰自創業迨於茲歲頻彰嘉貺屢覩真容使夫天清地寧物阜人庶六氣時若四夷來王皆聖祖之感也至道之應也成功不宰豈假於強名降福無疆敢

忘於昭報是用薦徽號增禮冊蠲潔以盡敬躬親以致誠
意既昭格良深感慶宜因展事更廣揚名夫聖人之生乃
先天地應變無體其德猶龍雖窅冥之初不知誰之子而
誕靈之後亦必有先聖祖父母著在圖牒母益壽氏已崇
徽號曰先天太后父周正御大夫敬追尊爲先天太皇仍
於譙郡置廟自餘一事以上準先天太后廟例昔契敷五
教殷以爲祖稷播百穀周以配天況咎繇邁種黎人懷德
我之本系千載彌光敬追尊爲德明皇帝涼武昭王朕十
一代祖也積德右地炳靈中葉奄有萬國兆先帝功敬追

尊爲興聖皇帝其陵側近仍並禁樵牧春秋二時備禮致祭且聖祖所理本在諸天將欲降靈固宜取象況爲帝號豈可名宮其元元宮宜爲太清宮西京改爲太清宮東京改爲太微宮天下諸郡改爲紫極宮兩京宮內道士宜先擇有道行者一七人自餘於新度人中簡擇取添滿三七人爲定額仍各賜近城莊園各一所並量賜奴婢等其道士女道士先令司封簡較不須更隸宗正寺所置崇元署宜停古人制禮祭用質明義旣取於尚幽情實緣於旣歿我聖祖湛然嘗在爲道之宗旣殊有盡之期須展事生之

禮自今已後每聖祖宮有昭告宜改用卯時已前行禮朕
深唯復樸將致無爲嘗恐至理難明元風未暢不有時習
焉能化成自今已後每至三元日宜令崇元館學士講道
德南華等諸經羣公百辟咸就觀禮庶使軒冕之士盡宏
南郭之風寰海之內咸爲大庭之俗其崇元館大學士宜
賜物一百匹學士賜六十匹直學士四十匹宮內先配住
道士各二十匹宣布中外令識朕懷

命金憲英襲封新羅王制

故開府儀同三司使持節大都督雞林州諸軍事兼持節

寧海軍使新羅王金承慶弟憲英奕葉懷仁率心嘗禮大
賢風教條理尤明中夏軌儀衣冠素襲馳海琛而遣使準
雲呂而通朝代爲純臣累效忠節頃者兄承土宇沒而絕
嗣弟膺繼及抑惟常經是用賓懷優以冊命宜因舊業俾
承蕃長之名仍加殊禮載錫漢官之號可襲兄新羅國王
開府儀同三司使持節大都督雞林州諸軍事兼充持節
寧海軍使

九月薦衣陵寢制

禋祀者所以展誠敬之心薦新者所以申霜露之思是知

先王制禮蓋緣情而感時朕承丕業肅恭祀事至於諸節
嘗修薦享自流火屆期商風改律載深追遠感物增懷且
詩著授衣令存休澣在於臣子猶及恩私恭事園陵未標
典式自今以後每至九月一日薦衣於陵寢貽範千載庶
展孝思且仲夏端午事無典實傳之淺俗遂乃移風況乎
以孝道人因親設教感游衣於漢紀成獻服於禮文宣示
庶寮令知朕意

命孔璣之襲封文宣公制

朕永維聖道思闡儒風故尊崇先聖所以宏至教褒獎後

嗣所以美前烈文宣王三十五代孫通直郎前守邠王府
文學褒聖侯孔璣之纂承睿哲克履中庸三命益恭敦素
憑於祖業百代必祀光寵被於朝恩積慶之餘旣開於土
宇盛德不朽宜傳於帶礪可襲封文宣公兗州長史遷都
水使者食邑一千戶

改年爲載推恩制

履端正名義取垂範體元設教在乎變通雖沿革從宜罔
不稽古朕纘復興運恭守睿圖嘗恐至化猶微淳風尚薄
未能臻華胥之俗登可封之人故未明求衣日昃忘食勵

精爲理思致雖和厯觀載籍詳求前制而唐虞之際煥乎可述用是欽若舊典以協惟新可改天寶三年爲載今春事將興陽和布澤發號施令之日革故履新之時宜宏在宥之恩以助生成之化其天下見禁囚徒應雜犯罪死者宜各降一等自餘一切放免其十惡及造僞妖妄頭首官吏犯賊並姦盜等害政旣深情難容恕不在免限凡諸郡縣仍令太守縣令勸課農桑其先處分太守縣令在任有增減戶口成分者所繇司量爲殿最自今以後太守縣令兼能勾當租庸每載加數成分者特賜以中上考如三載

之內皆成分所司錄奏超資與處分其丁戶仍須案實不得取虛挂之名使親隣代納受其奸弊凡在黎獻實資存恤一失生業則流庸不歸每軫於懷深可矜憫諸色當番人應送資課者當郡具申尚書省勾覆如身至上處勿更抑令納資致使往來辛苦從閏二月至六月已來其當上人中有單貧老弱者委郡縣長官與所繇計會便放營農諸軍征鎮及在疴羸疾病者委節度使速擇放還中外庶僚勉修其職各副朕意宣布遐邇咸使知聞

放免囚徒制

王者法天惠人順時行令是惟舊典用致和平朕臨御萬
邦於茲三紀宵衣旰食思宏至化尚恐天下郡縣囹圄滯
留不即䟽決以傷和氣今三農在時宜助生育庶覃寬宥
之澤以協上元之心其天下見禁囚徒應合死配流嶺南
流已下罪并見徒一切放免其責保在外及追捉未獲者
并同見禁例處分其京城內宜令中書門下即分往䟽決
應合流人便配訖聞奏其東京及北京兼諸郡各委所繇
長官準此處分即宣示中外咸使知聞

令詳定九宮壇儀注制

惟神之主必恭禋祀率先之訓義在躬親朕欽若昊穹子
育黎庶思通明靈之德以洽和平之理是修闕典咸秩無
文如在之誠久陳於郊廟懷柔之至亦徧於山川況九宮
所主百神之貴上分天極下統坤維陰陽生靈功深亭育
故式昭新典肇建明祠將以爲人載祈孚佑宜叶元辰之
吉用申大祭之禮可以今月立春朕親祀九宮壇仍令中
書門下與禮官等即詳定儀注奏聞

封和義公主出降寧遠國王制

呼韓來享位列侯王烏孫入和義通姻好懷柔之道今古

攸同寧遠國奉化王驃騎大將軍阿悉爛達干志慕朝化
誓爲邊扞漸聲教而有孚勤職貢而無闕誠深內附禮異
殊隣爰錫嘉偶特申殊渥四從弟前河南府陽城縣令參
第四女質稟幽閒性惟純懿承姆師之訓導寔宗人之光
儀固可以保合戎庭克諧邦選宜膺遠好以寵名蕃可封
和義公主降寧遠國奉化王

封太華公主制

肅邕稟德邦化所崇湯沐疏封古訓斯在第二十一女踐
修閭則素承阿保之嚴砥礪嬪儀率由圖史之範璫珩旣

佩柔愿無違蕙問充昭常華自著肇施綵級將具禮於輜
輶載錫粉田俾申榮於井賦可封太華公主食實封一千
戶

封壽光公主樂成公主制

闕之德教始宮闈湯

闕

皇帝二十二女二十三女誕膺

闕

發令姿頗沐公宮之訓遵師氏之則顧史瞻圖日將月就
華宗叶慶方從下嫁之儀盛典申榮式備開封之制二十
二女可封壽光公主二十三女可封樂成公主仍各食實
封一千戶

欽定全唐文卷二十五目錄

元宗 六

安養百姓及諸改革制

南郊推恩制

授陳希烈左相制

定禮部試帖經制

授榮王琬安北大都護制

上聖祖及諸廟帝后尊號推恩制

封廣寧公主制

封安祿山東平郡王制

改宗廟稱告享制

贈汝陽王璉太子太師制

改置黃帝壇制

贈慶王琮靖德太子制

授楊國忠右相制

贈楊珣鄭國公制

加哥舒翰爵賞制

授韋見素同平章事制

封葛邏祿葉護頓毗伽金山王制

天長節推恩制

令錢貨兼用制

置十道勸農判官制

宣慰湖南制

賜汴王璲謚制

誅姜慶初等并削裴倣官爵制

封新平郡主制

封安定郡主制

欽定全唐文

卷二十五

目錄

二

授嗣澤王珣國子司業制

加貴妃豆盧氏等食實封制

欽定全唐文卷二十五

元宗 六

安養百姓及諸改革制

勅愛人者天地之德育物者陽和之氣朕立極行政體元
順時期於緝熙致彼仁壽今永惟春令慶在發生當萬有
之遂心虞一物之失所救人恤隱雖已著於成式施惠布
德俾更宏於新令其天下百姓有灼然單貧不存濟者緣
租庸先立長行每鄉量放十丁猶恐編戶之中懸磬者衆
限數旣少或未優洽若有此色尚軫於懷特宜每鄉前放

三十丁仍準旨條處分待資產稍成任依恒式其所放丁
委縣令對鄉村一一審定務須得實仍令太守子細案覆
本道使察訪如有不當者本里正村正先決一百配入軍
團縣令解太守本道使不舉者量貶降七德爲武必先禁
暴五材並用誰能去兵自古蓋非獲已關山遠戍雖多懸
本之情祿位高懸終有懋功之賞若能感激信可優矜其
諸征行人家有兼丁如載限向滿情願自相替者宜聽其
家內應合更差防及諸雜差科一切放免古者黜陟幽明
廉問風俗匪惟察吏亦以恤人今考績之期已過於三載

求瘼之意欲觀於四方宜即選擇使臣分往諸道訪察官吏善惡巡問百姓疾苦兼太守縣令老耄者比聞諸郡或有損處尋令賑恤猶慮艱辛須更優矜務使周濟其開元二十九載內外官所舉太守縣令等朕以撫字之任急於用賢特令舉親務欲求實翹車旣至頓網無遺不限登科皆令効職旣推心而無負期濟理而有成一自守官向已終秩思聞爲政之績以觀推薦之義先有處分必行賞罰尤須審察將復前言迴日並具狀奏聞且量地制邑大小雖殊置吏養人遠近如一比來中下縣令或非精選吏曹

因循徒務填闕天下大率小縣稍多至於蒼生詎免其弊
若無優獎豈致循良旣在得人寧拘格限宜令選人內取
中外清資是明經進士應制明法並資蔭出身有幹局書
判者各於當色內量減一兩選注選擬赴任之日仍令引
見朕當察審去就其老弱者更不得輒注考滿之後準畿
官等例三選聽集在任有政績尤異者三考外委本道採
訪使與通狀應是下下縣仍并昇爲中下縣又令長字人
不可蹙闕比來補授直至選時亦有縣在僻遠多不情願
遂虛其位累載闕人旣無本官爲政不一戶口逃散莫不

由茲自今已後宜令選司先量才注擬如非時有事故等
闕者所有當月牒中書門下於內外官中簡擇進擬遣今
所在京員外人數稍衆旣無職事頗亦滯才其高品者宜
簡擇量授郡守六品以下堪理人者亦授縣令俾其効用
冀有成績天下郡縣先有欠公廨本處今旣分稅錢並準
式依本足例支給使厚其祿以竭其心經國之制省官爲
本況分司揆務旣有常員授職任人須存定限若踰程式
實紊紀綱其內外六品以下員外官至考滿後一切並停
合依選例自今已後更不得注擬其皇親諸親幼小及諸

色承恩授官軍功技術內省左右龍武軍并諸番官等不在此限所司仍具作條件處分且禮經垂訓篇目攸殊或未盡於通體是有乖於大義昔如堯命四子所以授時周分六官曾不繫月先王行令蓋取於斯苟分至之可言何弦望之足舉其禮記月令宜改爲時令但五方定位岳鎮總其靈萬物阜成雲雨施其潤上帝攸宅寰宇是仰且岱宗西岳先已崇封其中岳等三方典禮所尊未齊名秩永言光被用叶靈心其中嶽神宜封爲中天王南嶽神爲司天王北嶽神爲安天王應須祭告仍令所司擇日聞奏天

下山水名稱或同義且不經多因於里諺事若仍舊何成於禹別宜令所司各據圖籍改定訖奏聞

南郊推恩制

昭事昊穹必惟殷祀蓋順帝則而成政也肅雍清廟必惟嚴享蓋繼先志而爲孝也則累聖之德在人元陽之和在候思所以達明靈之景貺迪皇王之大猷者矣朕夕惕宵衣奉天續業勉思政道惟懷永圖賴百辟庶官輔予不逮聲朝無遠車書靡殊加以乾符坤珍日來月往感福應之尤盛懼明祠之未殷且資父事天因親設教沿情以達禮

廣敬以推尊時享之誠寧宜異數日舉之饋豈忘事生是以疇咨故典率循新禮對越上靈聿追嚴配旣而崇牙宿設明德惟馨敬爾臣工駿奔執豆陟降至止樂徧禮成精意上協神休下答宜廣維祺之福以覃作解之恩其天下見禁囚徒除十惡死罪及官典犯賊自餘一切放免自天寶元年已前流人及配隸効力左降官非反逆緣坐其並量移近處其中有年齒衰暮情可哀矜者仍聽致仕朕承大道之訓務好生之德施令約法已去極刑議罪執文猶存舊目旣措而不用亦惡聞其名自今以後斷絞斬刑者

宜除削此條仍令法官約近例詳定處分三皇五帝道冠
開闢創物垂範功濟生靈繼天之德在墳典而昭著勤人
之祀於禮文而尚闕永言龜鏡宜示欽崇其三皇宜置一
廟五帝亦置一廟即令所司卜擇吉地營建仍以時致祭
其廟令太常寺簡較諸廟之主禮有遵於合祭同等則祔
義亦取於旁通惠宣太子等雖官爲立廟比來子孫自祭
或時物有闕禮儀不備興言及此良用憮然宜與隱太子
及懿德太子列次諸室擇揀一寬處同爲廟一應祭祀及
樂饌等並令官供每差祭官宜依常式仍都置廟官及丞

等自餘所廢廟官等並宜減省莫獻旣昭感思增達恭惟
陰教以集禎祥自獻祖宣莊皇后張氏已下祖父未有贈
官及一房子孫沈翳所司即以名聞將展褻崇以申追慕
王業之初羣才佐命中興之後元宰協心且配食廟庭必
重勲德循名冊府尚有關遺緬懷茂功用增禮典自今已
後太廟配享功臣高祖室宜加裴寂劉文靜太宗室加長
孫無忌李靖杜如晦高宗室加褚遂良高季輔劉仁軌中
宗室加狄仁傑魏元忠王同皎文武之道旣惟並用宗敬
之義不可獨闕其鄉貢武舉人上省先令謁太公廟每拜

大將及行師克捷亦宜告廟今勝殘在運無事爲心顧此朝儀當符至理旣時非旰食將至升平而廷設殺刑何成在宥其每日立仗食設杖鉞等並宜停廢立身揚名所以廣孝流根自葉亦在推恩旣切因親之心須開議事之制其内外文武官五品已上官父祖無資蔭者其所蔭宜同子孫用蔭之例五服之紀宜所跂及三年之數以報免懷齊斬之殊雖存出母之制顧復之慕何申孝子之心其出嫁母宜終服三載祭祀之典犧牲所備將有達於虔誠蓋不資於廣殺況牛之爲畜人實有賴旣功施於播種亦力

被於車輿此比餘生尤可矜憫但前聖有作難爲盡廢明
神克享亦在深仁自今已後每大祭祀應用駢犢宜令所
司量減其數仍永爲常式崇我祖訓其惟道門將以福助
生靈宏拯天下諸觀道士等如聞人數今少修行多闕其
欠少人處宜度滿七人並取三十已上灼然有道行經業
者充仍令所繇長官精加試練採訪使重覆勿使踰濫度
訖挾名奏聞其諸觀有絕無人處亦量度三兩人準此簡
試選賢擇能嘗慮不廣三府之辟則惟採於大名四科之
薦蓋不通於小學今承平旣久仕進多端必欲遠賁弓旌

載空巖穴片善必錄末技無遺天下諸色人中通明一藝
已上各任薦舉仍委所在郡縣長官精加試練灼然超絕
流輩遠近所推者具名送省仍委尚書及左右丞諸司委
御史中丞更加對試務取名實相副一時奏聞四瀆五嶽
雖差秩序興雲播潤蓋同利物崇號所及錫命宜均其五
嶽旣已封王四瀆當外公位遞從加等以答靈心其河瀆
宜封靈源公濟瀆封清源公江瀆封廣源公淮瀆封長源
公仍令所司擇日差使告祭自古聖帝明王忠臣烈士陵
墓有頽毀者先令修葺并禁樵採歲月深久摧壞或多宜

令所繇郡縣申明前勅處分並五嶽及諸名山大川並令所在長官致祭諸郡義倉本防水旱如聞多有費損妄作破除自今已後每郡差一上佐專知除賑給百姓之外更不得輒將雜用天下百姓今載應損郡逋租懸調諸色勾徵變換等物及諸延限者並宜一切放免征行之家每令存恤差科之際或未優矜自今已後並準飛騎例蠲免天下侍老百歲已上賜綿帛五段粟三碩八十已上綿帛三段粟二碩仍令所在長官存問各即分付亞獻太子璵賜物二千匹終獻慶王琮賜物一千匹京文武官各賜帛有

差天下賜酺三日

授陳希烈左相制

門下仲虺相湯言宣雅誥子魚佐魏任總中兵將代天工
允憑時傑光祿大夫門下侍郎同中書門下平章事集賢
殿宏文館學士崇元館大學士太清太微宮使上柱國臨
潁縣開國侯陳希烈逸量宏達英才卓邁旣履直而成範
亦資忠而炳德學該流略義惟守於經門文麗風騷言必
詮於理要自黃樞貳職侍講金華紫府宏真參謀玉鉉歲
月逾久而其道彌光人師有屬於在三王度式歌於畫一

疇咨既久亮采惟熙宜正貂蟬之榮用兼喉舌之寄可行
左相兼兵部尚書餘如故

定禮部試帖經制

禮部舉人比來試人頗非允當帖經首尾不出前後復取
者也之乎頗相類之處下帖爲弊已久須是釐革禮部起
今每帖前後各出一行相類之處並不須帖

授榮王琬安北大都護制

街畫輿壤戎夏所交兵鎮專城藩衛攸重開府儀同三司
兼涼州牧單于大都護充持節朔方節度副大使榮王琬

溫仁植性孝友因心言必備於忠肅動必循於德義爰就
師傅學行可觀載錫珪符名器斯允移郭築壘功存禦要
距河臨塞籌切雄邊僉論所歸式遏斯寄宜加外總之名
俾授中權之略可兼安北大都護餘如故

上聖祖及諸廟帝后尊號推恩制

握乾圖者必稟於元命宗道本者允屬於強名是知順物
承天諒通昭感之德報功尊祖貴叶崇高之義朕祗荷丕
業恭臨大寶何嘗不宵衣滌慮菲食齋心奉元聖之垂範
爲蒼生以祈福自頃昊穹眷命至道降休玉芝再產眞容

累見嘉應薦來罔知攸答豈謂元記陰陽祕牒混成懸徵
造化之源密紀仙靈之洞慶崇真籙昭錫朕躬初驗神傳
竟彰天授幽深累跡旣殊於人代朴畧奇象固絕於名言
緬觀皇圖欽承道寶微旨有屬寅畏增深思申嚴敬之誠
以崇廣大之業謹上元元皇帝號曰聖祖大道元元皇帝
仍以來月五日朕親奉冊禮國家文祖神宗重熙累洽無
爲之訓垂祐清淨之德在人慎寧後昆累承大業是用欽
元符之景命歸清廟之延祥稟慶真源光昭聖烈謹上高
祖神堯皇帝尊謚曰高祖神堯大聖皇帝太穆皇后竇氏

尊諡曰太穆順聖皇后太宗文武聖帝尊諡曰太宗文武
大聖皇帝文德聖皇后長孫氏尊諡曰文德順聖皇后高
宗天皇大帝尊諡曰高宗天皇大聖皇帝大聖則天皇后
武氏尊諡曰則天順聖皇后中宗孝和皇帝尊諡曰中宗
孝和大聖皇帝和思皇后趙氏尊諡曰和思順聖皇后睿
宗元真皇帝尊諡曰睿宗元真大聖皇帝昭成皇后竇氏
尊諡曰昭成順聖皇后肅明皇后劉氏尊諡曰肅明順聖
皇后庶彰祈精之感降貽厥之元符聿修誠闕達孝思於
罔極更以來月五日於太清宮前恭禮闕寧王憲薛王業

各賜物八百匹忠王浚棣王洽鄂王滉光王浚等各賜物
七百匹中書門下賜物五百匹開府王毛仲賜物三百匹
皇親五等已上諸親三等已上及文武百寮各賜物有差
自古明王因心以待人由已以施物故休戚共而憂樂同
也中書門下丞相尚書開府三司大將軍父贈三品官九
卿三監十二衛監門羽林軍五省長官三府尹大都督府
長史父各贈四品官五品以上清官父各贈五品官凡所
贈官宜兼贈母邑號俾夫羣臣受榮上延父母先帝遺澤
下及幽冥與言及此良多感歎羣臣一體榮辱是同龍蛇

之歌古今作誠其唐元年兩營立功官三品以上與一子
官其四品以下選日優與進改京兆府供頓免今年地稅
諸道戰亡人家仰州縣存恤不支濟者量事賑給諸軍健
兒別勅行人各賜勲兩轉

封廣寧公主制

睦親之訓必備恩榮加命之貴是存優寵順成公主誕姿
中掖習訓公宮惠心有孚淑問斯著夙蘊柔閒之操克彰
婉婉之規式開湯沐雖已申於築館爰擇井田俾有光於
改邑可封廣寧公主依前實封一千戶

封安祿山東平郡王制

寄重者位崇勲高者禮厚欽若古訓抑惟舊章開府儀同
三司兼右羽林軍大將軍員外置同正員御史大夫范陽
大都督府長史柳城郡太守持節充范陽節度經略支度
營田陸運押兩蕃渤海黑水等四府節度處置及平盧軍
河北海運并管內採訪等事上柱國柳城郡開國公安祿
山性合韜鈴氣稟雄武聲威振於絕漠捍禦比於長城戰
必尅平智能料敵所以擢升臺憲仍仗旌麾旣表勤王之
誠屢申殄寇之略頃者契丹負德潛有禍心乃能運彼深

謀累梟渠帥風塵肅靜斥候無虞不有殊恩孰彰茂績疆
場式遏且薄衛霍之功土宇斯開宜踐韓彭之秩可封東
平郡王仍更賜實封二百戶通前五百戶餘如故

改宗廟稱告享制

春秋致享用存昭敬祝史陳信必在正辭苟名位之或乖
於上下而非便故經稱崇事易載禹若所以展祗肅明等
威朕欽崇道本嗣守丕業每懷如在之誠敢忘奉先之旨
禮或未達情實匪寧承前有事宗廟皆稱告享茲乃臨下
之辭頗虧尊上之義靜言斯稱殊未爲允自今已後每親

告獻太清宮太微宮改爲朝獻有司行事爲薦獻親告享
廟改爲朝享有司行事爲薦享親巡陵改爲朝拜有司行
事爲拜陵應緣諸事告宗廟者改爲奏其郊天后土及祀
祝云敢昭告者並改爲敢昭薦式崇寧禮庶表因心宣示
中外令知朕意

贈汝陽王璿太子太師制

睦親之恩理貫存歿飾終之禮義表哀榮故特進上柱國
汝陽郡王璿植性謙和執心恭懿聞詩禮而稟訓用忠信
而飭躬修詞立誠不虧於道依仁遊藝克著於名況久踐

崇班彌彰勤勵冀其永固藩翰有光公族奄茲殞歿良多
憫念宜加寵贈用旌幽宥可贈太子太師應緣喪葬量事
官供仍令京兆尹一人簡較葬事

改置黃帝壇制

王者臨馭萬國莫不尊奉五嶽至於迎氣致祭必在辨方
正位朕丕承眷命肅事嚴禮庶有令於乾坤用永垂於典
實加以厚德載物莫先於土推誠導氣必叶於時在厯數
之有徵諒國家之所感含宏廣大利用豐功隨王雖布於
四方歸本且闕於中位朕式明統緒用答元符爰創新儀

再修墜典頃者每祝黃帝乃就南郊義實有乖禮亦非便稽諸體式理固不然宜於皇城内西南就坤地改置黃帝壇朕當親祀以昭誠敬仍令中書門下與禮官更審參詳奏聞

贈慶王琮靖德太子制

追終悼往諒著於國章考行易名匪私於天屬故司徒兼太原尹持節充河東道諸軍節度大使支度營田等使上柱國慶王琮地居長嫡道茂中和爰在幼沖克光撝挹既著讓賢之美愈聞禮樂之風加之彫琢文藝周旋禮樂固

力行以近仁亦因心而爲孝自析圭胙土藩翰式崇授鉞
分符權略斯遠年方在壯未虞天喪疾瘵不救憫惜良深
宜循加贈之典式寵元儲之位可贈靖德太子應緣喪葬
一事已上宜並官供仍令太子少師韋縉充監護使京兆
尹裴士淹充副

授楊國忠右相制

先王立政必惟擇賢所以時亮天工叶修人紀總資三事
是屬中書審於百工僉曰亞相銀青光祿大夫御史大夫
判度支事權知太府卿兼蜀郡長史持節劔南節度使支

度營田等副大使本道兼山南西道採訪處置使兩京太府司農出納監倉祠祭木炭官市長春九成宮使關內道及京畿採訪處置使上柱國宏農縣開國伯楊國忠純粹精明懸解虛受比之管樂文多體要之詞擬於邴魏武有韜鈴之學直方其道簡易能成往自星郎爰秉天憲軍國大政宏益滋多則造膝沃心已期王佐彌綸經濟同致雍熙況南臺冢宰尤思藻鑑西垣鼎座深佇變和會予宿心升爾爲相宜兼密啟式總如綸可守右相兼吏部尚書集賢殿學士修國史崇元館大學士太清太微宮使仍判度

支及蜀郡大都督府長史劔南節度支度營田副大使本
道兼山南西道採訪處置使兩京出納勾當租庸鑄錢等
使並如故

贈楊珣鄭國公制

褒德紀功前王之令典飾忠追遠有國之能事況乎嗣生
大賢爲朕良弼應五百之數該二八之美調元而星辰以
理論道而陰陽以和而寵命未宏稱謂猶褊非所以崇推
恩之重廣延賞之義也右相兼吏部尚書判度支魏國公
楊國忠亡父贈持節魏郡諸軍事守魏郡太守珣赤泉儲

祉白環繼業膺積慶而誕德鍾具美而挺生枝茂者根深
流長者源濬是降英裔阜成兆人熙載而百度惟清審衡
而九流式序佐我元化格於皇天信爲名賢實稟庭訓雖
思人愛樹已有疇庸之策而因條振葉宜益封崇之事俾
以建旗之寵仍超曳履之榮旣旌徽烈用光泉壤可贈武
部尚書鄭國公母張氏可贈鄭國夫人

加哥舒翰爵賞制

授鉞登壇所以理兵用武益封命職所以褒德疇庸才傑
者建希代之功績茂者有非常之賞哲王令典無或踰之

開府儀同三司兼鴻臚卿員外置同正員西平郡王判武
部事攝御史大夫持節充隴右河西節度使支度營田長
行轉運九姓等副大使知節度事赤水軍使上柱國涼國
公哥舒翰挺生朔陞干城隴外青蛇入笥神發其祥白武
銜珠天資我寶美政以公惠著益深畧以果斷能成頃者
犬戎包藏禍盈惡稔南援蠻落東窺塞垣特稟廟謀厲八
神於金匱長驅戎境厯三軍於玉堂決水奔雷固無前敵
屠城拔壘靡有孑遺收九曲之舊疆開千里之沃壤亭障
臥鼓旣成禁暴之勲屯田饋軍益以豐財之用則議功行

賞厚禮酬勞俾吳芮之忠不獨光於漢策魏絳之樂無擅
美於闕闕仍兼望苑之榮繫以公田之錫可開府儀同三司
太子少保加賜實封二百戶通前滿五百戶賜音聲小兒
十人莊園各一所與一子五品官更與兩子官用旌元帥
之勞以益三軍之氣也餘並如故

授韋見素同平章事制

門下緝熙帝載必候大賢砥礪公才允膺殊獎銀青光祿
大夫行尚書吏部侍郎上柱國彭城郡開國公韋見素風
度宏遠操履貞固懷至公之節守難奪之誠學富典墳每

思經濟之義文雄搢紳豈獨彫蟲之英薦居東掖顧問有
光累拜南宮銓衡式序清素之業惠澤彌彰爾惟不矜朕
志先定信可發揮邦政翊贊台陞將宏夢卜之感俾協蒼
生之望可守武部尚書同中書門下平章事集賢院學士
知門下省事散官勲封如故

封葛邏祿葉護頓毗伽金山王制

葛邏祿葉護頓毗伽特稟英姿擅雄荒服威信馭衆智略
超羣仗宏義以立節竭至誠而嚮順逆虜阿布思邱山積
釁天地匪容未就誅夷仍茲鼠竄遂能率引弓之旅佐轉

戰之師生縛兇渠咸殲醜類雖不長元惡顧神理之必誅
而與我同仇乃忠勇之斯美疇其茂績寵以殊榮可開府
儀同三司封金山王依舊充葉護祿俸於北庭給其葉護
妻及母並封爲國夫人

天長節推恩制

朕臨馭萬邦迄今四紀曷嘗不虔誠至道銳心庶政昊穹
孚祐俗致升平仁壽之域漸登太和之風斯在比歲小有
僭亢頗非豐稔遂使開倉賑乏空囿恤刑兼蠲徭省賦故
得家給人足頃者農功正興而霑澤頻阻言念黎獻匪遑

底寧是用發於精誠庶乎昭鑒至誠上達膏雨應期俾夏
苗如雲秋穫不日周覽原野宛同茨梁豈惟有慰朕懷實
亦克符人慶此皆上元垂貺宗社降靈豈曰朕躬所能通
感屬天長令節盛德在金爰因歡慶之辰用申雷雨之澤
其天下見禁囚徒有犯十惡及謀殺偽造頭首罪至死者
特宜免死配流嶺南遠惡處自餘一切釋放聖人積不涸
之泉王者用無窮之府支計苟足多賦何爲天下百姓今
載租庸並宜放半所運糧儲本資國用太倉今旣餘羨江
淮轉輸艱勞務在從宜何必舊數其來載水運入京宜並

停如聞天下諸郡逃戶有田宅產業妄被人破除並緣欠
負租庸親隣貨賣及其歸復無所依投永言此流須加安
輯應復業者宜並給還縱已代出租庸不在徵賠之限書
云咸秩羣望詩曰懷柔百神永惟明徵豈忘昭報今秋稼
穡頗勝常年實賴靈祇福臻稔歲其五嶽四瀆所在山川
及得道升仙靈迹之處宜委郡縣長官至秋後各令醮祭
務崇嚴潔式展誠享無廣屠宰以備牲牢其天下侍老宜
各量賜米麥又親人之要令長爲重比雖精選未盡徵求
卓魯之才或遺蒲密之化安寄宜令京官五品以上正員

文官三品以上正員武官及郎中御史各舉堪任縣令一人具名申省委有司試擇奏授其有善惡賞罰與舉主並同僚佐限期一時令集王制下士視上農周政庶士倍祿若衣食旣足則廉恥乃知至於資用靡充或貪求不已敗名冒法實此之繇輦轂之下尤難取給其在兩京文武九品已上正員旣親於職務可謂勤心自今已後每月給俸食雜用防閑庶僕等宜十分爲率加二分其同正員官加一分仍永爲常式其南衙九品已上并京兆府畿令等宜共賜物二萬匹左右龍武軍各賜一千匹其唐元功臣念

言勲舊宜異常倫兩軍各賜物二千匹餘各有差庶生成
之澤自葉而流根慶賞之恩繇衷以暢物宜宣示遐邇知
朕意焉

令錢貨兼用制

綾羅絹布雜貨等交易皆合通用如聞市肆必須見錢深
非道理自今已後與錢貨兼用違法者準法罪之

置十道勸農判官制

人惟邦本本固邦寧必在安人方能固本永言理道實獲
朕心思所以康濟黎庶寵綏華夏上副宗廟乾坤之寄下

答寓縣貢獻之勤何嘗不夜分輟寢日旰忘食然以眇眇之身當四海之貴雖則長想遐邇不可家至日見至於宣布政教安輯逋亡言念再三其勤至矣莫副朕命實用恧焉當展永懷靜言厥緒豈人流自久招諭不還上情靡通於下衆心罔達於上求之明發想見其人當屬括地使宇文融謁見於延英殿朕以人必土著因議逃亡嘉其忠讜堪任以事乃授其田戶紀綱兼委之都縣釐革便令充使奉以安人遂能恤我黎元克將朕命發自夏首及於歲終巡按所及歸首百萬仍聞宣制之日老幼欣躍惟令是從

多流淚以感朕心咸吐誠以荷王命猶恐朕之薄德未孚
於人撫字安存更冀良算遂命百司長吏方州岳牧僉議
廟堂廣徵異見羣詞盈於札翰環省彌於旬日庶廣朕意
豈以爲勞稽衆考言謂斯折衷欲人必信期於令行凡爾
司存勉以遵守夫食爲人天富而後教經教彝體前哲至
言故平糴行於昔王義倉加於近代所以存九年之蓄收
上中之斂穰賤則農不傷財災饑則時無菜色救人活國
其利博哉今流戶大來玉田載理敖庾之務寤寐所懷其
客戶所稅錢宜均充所在常平倉用仍許預付價直任粟

麥兼貯并舊常平錢粟並委本道判官勾當處置使斂散及時務以矜恤且分災恤患州黨之常情損餘濟闕親隣之善貸故木鐸云徇里胥均功夜績相從齊俗以贍今陽和布澤丁壯就田言念鰥嫠事資拯助宜委使司與州縣商量勸作農社貧富相恤耕耘以時仍每至雨澤之後種穫忙月州縣常務一切停減使趨時急於備寇尺璧賤於寸陰是則天無虛施人無遺力又政在經遠功惟久著今逃亡初復居業未康循逃戶及籍外剩田猶宜勞徠理資存撫其十道分判官三五年內使就厥功令有終始當道

覆

闕

及須推効並以委之不須廣差餘使示專其事不擾於人政術有能必行賞罰其已奏復業歸首勾當州縣每季一申不須挾名致有勞擾其歸首戶各令新首處與本貫計會年戶色役勿欺隱及其兩處徵科宣布天下使明知朕意

宣慰湖南制

震澤之南數州之地頃以水潦暴至沱潛潰溢旣敗城郭復瀦原田連歲大歉元元重困餒殍相望流庸莫返加之以師旅煩之以賦役哀我矜人何以堪命朕君臨之道猶

鬱牧養之政未宏咎之所降諒在於茲雖天災流行則有
恒數而夕惕若厲豈忘責躬夫振人育物大易之明義也
自漢魏以來水旱之處必遣使巡問以安集之國朝因其
制焉亦命近臣慰撫俾喻求瘼之意用紓科斂之急宜令
中散大夫給事中賀若察往湖南宣慰處置其百姓遭損
不能自存者應須賑給蠲免宜與本道觀察使商量處置
訖聞奏仍齎詔書體問周恤宣示郡邑令悉朕懷

賜汴王璿諡制

門下緣情制禮賢聖所不忘以諡易名古今之同貫故右

千牛衛大將軍上柱國汴王璠雖在齟齬頗標嶷岐率以
訓典期於老成裂地而封是崇藩屏享年不永俄從夭折
秀而不實有以傷嗟宜遵考行之義以備飾終之典可諡
曰哀

誅姜慶初等并削裴倣官爵制

不敬之大在於毀犯陵園自擅之重切於矯誣詔令有此
亂常之道必貽無赦之責姜慶初自以頑劣得參姻婭錄
其先効擢在西臺素無行能已速官謗朕永感霜露式瞻
松柏以其職司俾往底事輒於禁域擅鑿連岡當衣冠之

出遊臨歲月之所建既有犯於神御又不利於王室知其

不可固有所專

疑

一昨臨遣再三戒勅無君棄命兇蠹尤

深書不云乎刑故無小況釋之明陵土之義申屠致廟塽
之誅死未云責不忘私眷特緩嚴刑宜賜自盡史忠烈王
臣子等忝從所職敢有挾邪事既同科法當均罪亦宜賜
自盡其家貲並收沒其駙馬裴倣雖不知情合當緣坐且
削官爵拘於私第永清公主亦隨在宅仍絕朝參使知警
懼朕自君臨每思刑措豈圖戚里干我國章任匪其人有
慙所鑒議法難恕撫懷增傷百辟卿士知朕意焉

封新平郡主制

門下惠宣太子第三十一女柔姿婉訓淑德閑和早習組紉備詳圖史移天有禮撰日于歸宜增列郡之封允叶睦親之計可封新平郡主主者施行

封安定郡主制

門下故惠宣太子第三十女肅雍成性柔婉爲容稟訓女師克嫺嬪則爰占近日用叶初笄申錫美名受封良邑可封安定郡主主者施行

授嗣澤王珣國子司業制

門下嗣澤王珣承派咸池分輝扶景錫珪前寵纂周典之
親賢磐石今隆高漢朝之子弟機彩明悟神情峻拔雅量
夙成宏才早著儒庠教胄適資於下帷蕃郡理人允求於
別乘衣冠就秩宜頒列位之榮并賦開疆仍茂承家之業
可國子司業

加貴妃豆盧氏等食實封制

有德者位崇有功者秩厚事本關於國體理無隔於邦媛
故周母有亂臣之名漢嬪有比侯之爵睿宗貴妃豆盧氏
賢妃王氏性質陰禮實毗內政訓行九御譽滿六宮歲祀

雖淹微音未昧宜啟非常之命特賜湯沐之邑可各食實
封二百戶